

## ■ COLUMNA

SANDRO BUCHLI/FMR

Filippo «Pippo» Inzaghi, quai è in num ch'è collià per mai cun bler. Cun fitg bler. Pippo Inzaghi, in num, in fenomen: Nagin talent, betg robust, dus pes sanesters, quai attestavan ils experts da ballape a lezzas uras a Pippo. Pippo saja «nashì en l'offside». El n'era betg ferm cun il chau, betg spezialmain spert, betg in grond «tecnicist» – Pippo Inzaghi, il numer 9 da la AC Milano.

Ma Pippo Inzaghi aveva ina qualitad. El era in killer davant il gol da l'adversari. El era adina, ma vairamain adina, en il dretg mument en il dretg lieu! Ses instinct da far gols era genial. In «killer» par excellence. Ed el era fitg precis.

Quel Pippo ha midà mia vita. Cun 12 onns ma tschent jau per l'emprima giada en mia vita en il San Siro, en il stadion da Giuseppe Meazza cun var 75 000 plazs. Grazia a noss trenader dal club da ballape da Laax. Grazia a Peter. Peter aveva manevrà l'entir club da la provinza sursilvana en la metropola Milano per guardar la partida AC Milano – AS Roma, il december 2002. Peter è, quai sa chapescha da sasez, in fan da la AC Milano.

La AC Milano aveva da lezzas uras ina equipa «spickada» cun stars: Maldini, Nesta, Pirlo, Seedorf. Nums da num e da pum! E da gudagnar encunter quels da la chapitala Roma valeva bler. I gieva per prestige ed onur.

La partida dentant era ditg in pau lungurusa. Tactica. La tactica d'equipas talianas era enconuschenta lunsch enturn. En l'Italia vegn mess blera paisa sin lavur defensiva. Gudagnar 1:0 – quai era il resultat classic en l'Italia da quels onns. E sut l'egida da Carlo Ance-

lotti aveva la AC Milano perfectiunà quest stil e resultat. Els na faschevan betg blers gols, ma guadagnavan tuttina prest tut. E quai avain era nus senti quella saira. Pierluigi Collina, «Glatze Gnadenlos», il schiri, aveva tut sut controlla. 0:0 da pausa.

Enus uffants avevan ord lungurella cumenzà da far confettis or dal heftli dal matsch. E spetgavan en la fradaglia milanaisa gia sin la fin da la partida. L'auter di avevi puspè num dad ir a scola... e lura...

3avla minuta: Pippo vegn finalmain midà en la partida per il Brazilian e filigrantechniker Serginho. Finalmain! Jau aveva puspè speranza.

Elura capita quai ch'ha stuì capitar! Quai che tuts bramavan! Pippo Inzaghi, be 10 minutas en il gieuv, survegn in pass genial dad Andrea Pirlo, curra, pass dubel cun Shevchenko, e zac, cun sang-fraid e precisiun stauscha el la balla sper il goli da Roma vi, 1:0! GOL! Milano strembla, Milano batta, Milano sballuna. PIPPO PIPPO PIPPO! Nus sajettain noss confettis en il tschiel milanais ed avain tuts pel giaglina. El era puspè qua, Pippo Inzaghi, il dretg mument en il dretg lieu. Pippo! Grande PIPPO! Fieu e fim da pe-tardas dapertut!

Ed il cor dal pitschen Sandro era da quel mument davent pers. Dapi lura èn sias colurs il nair ed il cotschen – sco la AC Milano. Grazia a Pippo, grazia a Peter.

La AC Milano ha natiralmain gudagnà quella partida cun 1:0. E Sandro Buchli ha anc adina pel giaglina cura ch'el patratga vidlonder. Il video dal gol da Pippo è era da vesair sin youtube, sco tschients auters da Pippo.

# Pippo e l'art dad esser adina al dretg lieu

